

## Vorrede.

Flemisch/ Darumb hab ich einen schönen/guten Gliedergansen jungen Hengst von vier bis in fünff Jahren mögen kauffen/ aber jekunder ( vnd noch vor diesem gegenwertigen Krieg/ zu besorgen werde sendthero noch ärger worden seyn/ oder lander/ noch werden) ist der gemeine Preys dreissig/ vierzig/ vnd fünffzig Pfunde Flemisch/ darbey ist augenscheinlich zu sehen/ in was Aufschlag die Pferdte gerathen: Was wollen wir aber von vnseren eigenen Rossen sagen? Muß einer nicht vmb einen Klepper/ der ein wenig ein ansehen hat/ achtzig/neunzig/ ja wohl hundert Thaler geben/ den er noch vor wenig Jahren vmb fünffzig oder sechzig gekauffet hette? Was ist aber die Ursach? Das man die Gestüt vnd Rosszucht vberall hat lassen abgehen/ vnd nemlich den Vnkosten vnd Arbeit gescheuet/ also das jekunder schier niemandt mehr Rossz zeucht/ also eben die Bauwren/ welche weder vermögen/ noch auch die Gelegenheit haben/ köstliche edel Bescheller (darvon in diesem Büchlein an seinem Ort die Notdurfft würdt vermeldet werden) zu kauffen/ oder zubekommen/ sondern brauchen gleich Bescheller so gut sie es haben mögen. Was folget aber weiter darauß? Das sie auch Bauwren oder Wagen Rossz ziehen/ nemlich den Beschellern gemeh/ welche sie gebrauchen ( Simile enim generat suum simile) Das gibet der Augenschein genugsam zu erkennen: Dann ich kan der gleichen Rossz nicht mehr sehen/ weder von den Neapolitanern/ Spaniern/ Türcken/ vnd noch viel minder von den Teutschen/ die ich nun vor zwanzig vnd noch minder Jahren gesehen: Es kommet nichts mehr herfür (ich rede dieses Orts von vnsern Teutschen Rossen/ Dann die andern seynd gar Wildbrett worden) das man für ein Hauptrossz halten möchte/ sondern allein Klepper vnd Wagen oder Gosi Rossz/ Die seynd auch in solchen Aufschlag kommen/ das sie nun mehr theurer seyn/ als vor Jahren die gute vnd edele Rossz.

Was folget aber auß diesem allem? Das wir ganz vnd gar von der guten Reutterey kommen/ begibet sich jederman nur auff Klepper/ vnd auff die Faulheit der Gosi/ die seynd in wenig Jahren so gemein worden in der ganzen Christenheit/ das man sich der guten Rossz nicht mehr achtet/ wann mans gleichwohl nun gar wohl/ vnd noch darzu gutes Kauffs bekommen möchte/ ja man richtet die Gosi auch dermassen zu der Faulheit/ das einer ein ganze Haushaltung sampt der Küchen vnd Keller darauß führen kan/ ist alles dermassen accommodieret/ das ihme einer nicht lasse wehe geschehen. Mich wil aber geduncken/ (wann wir es recht wolten erwegen) das wir mehr als zuviel Ursachen haben/ der guten edelen Kriegssrossz zu dem höchsten zuachten/ denselbigen mit ganzem Fleiß vnd Ernst nachzustellen/ vnd vns billicher auff dieselbigen zu begeben/ als auff die Gosi vnd andere der gleichen Wagenfahrten/ auch wohl Ursach genug vorhanden/ das man dieselbige gar abschieffe/ oder doch zum allerminsten eine Moderation darinnen machete ( wie man in Hispania mit den Eseln gethan/ welche man vnder der Deckhin zureutten ganz vnd gar verhotten/ oder aber die Licenz mit Gest kauffen müssen/ diweil sich jederman auff dieselbe Reutterey begeben/ vnd die Rossz dardurch in grossen Abfall gerathen) damit man nicht so gar von dem Kriegswesen vnd der Reutterey komme/ Dann so man einmahl recht darvon kommet/ so kan man so baldt nicht wider darzu kommen/ als man wohl vermeinet/ man kommet vmb die Rossz/ vnd das Volk kommet auß der Übung oder Gewohnheit des Reittens/ bis man es hernach widerumb in ein thun vnd Gang bringet/ da gehöret viel zu: Ich kan nicht läugnen/ das es nicht eine grosse Gelegenheit gibet mit diesen Wägen/ aber hergegen so nemmen wir an vnsern Kräfte vnd Stärckin dardurch je länger je mehr ab: Es hat noch vor wenig Jahren mancher Edels vnd Vnedels Standt etliche gute Pferde vnd Knecht darzu gehalten/ mit denen Er sich zu fürfallender Noth/ vor dem Feinde wohl hette dürffen sehen lassen/ der hat jekund die Gelegenheit der Wägen vermercket/ sich derohalben seiner guten Pferde vnd Knechte abgethan/ vnd nach einem Gosi getrachet vnd vmbgesehen/ Darauß er sich seib ander oder dritt/ zeucht darmit ein ganzes Lande durch? Es ist nicht minder/ das nicht etwas statliches an der Zehrung vnd Haushaltung ersparet würd/ sollte es aber darzu kommen (welches Gott gnädiglichen wolle verhüten/ Dann wir haben keinen Brieff darfür) das wir von einem ausländischen Feinde würden angriffen oder verfallen/ so würden wir alsdann auch wohl erfahren/ wie wir bestehen würden/ vnd würde